

四庫全書

集部

欽定四庫全書

集部

十五家詞卷

十五至
十七

詳校官內閣學士臣尹壯圖

侍讀臣孫球覆勘

總校官降調編修臣倉聖脉

校對官中書臣蔡廷衡

謄錄監生臣楊聿修

欽定四庫全書

十五家詞卷十五

休寧孫默編

陳世祥含影詞下

吊調

鵲踏枝

病緒

愁病如愁誰見慰著甚來繇陡地思量梅花片片飛春
不繫燕兒爭取愁他墜翠損紅零羞問婢只有菱花

是我真知己，彊起無情還。欲睡羅幃更被香憔悴。

愁

潦倒十年愁，虛裏病酒逋。詩意興都無幾，愁緒世間何物比。青衫濕似邗江水。著地尋來誰可避。好月名花，加倍添人淚。最叵天公無意味。生生風雨將春廢。

上曲陽春日

依舊春來生綠草。風雪無端偏阻行人道。歸夢不成頻又覺。可憐只是懽娛少。也似江南山色好。曾見花開。

一樣蜂兒鬧閒著莫教樓上眺鄉心蚤比愁先到

責草

抹雨拖煙愁色重千里長途為甚年年種慣把行人來
斷送樓頭一望青無縫 狼藉好花鋪作供南北東西
是處惟伊橫勾引香閨春緒動新泥污損鞋尖鳳

問柳

煙柳成絲無甚繫只是橋邊日日嘶征騎故把長條垂
到地分明做就離亭意 滿院飛花狼藉墜墜向筵前

撲面如人淚卷作毬兒吹又碎浮萍一夜遮池水

冬閨

可憐殘臘無多許剩雪零冰還做淒涼雨
熬盡水沉無暖處好香不伴愁人住
燈焰青熒花不吐冷夢依稀欲記無
頭緒喚起侍兒癡不語夜分應是多過午

東諸公敬亭讌集

代作

記得瑤花樓絕巘轉磴迴谿多少流雲串
俯看萬松攢翠線南湖平展琉璃面
想到高人能繼綫搖筆豪情

玉笋飛如箭新月曉霞天不倦千年韓李將無見

韓退之亦

寓客

春寒

未及春來愁已及春到梅花花朵還重襲
饑雀啄拋紅粒粒東君儘把幽香蟄
酒倦詩逋成悵悵擬泛輕舟怕見歸潮急
是處天涯愁盡入一窻風雨燈花灺

漁家傲

漁父

未織晚煙紛似絮
濤牙嚼雪扁舟度
網得魚兒茭葉覆
呼阿婦村中沽酒將錢去
半醉歸來船倚樹
大江多少風波路
阿婦向前叉手訴
君休誤風波除却何方住

燭花

蜂蠟為誰開並萼
銅龍已下重門鑰
多少相思無處著
休見謔紫明知道人消索
舊夢新愁眉上閣
今春較比年來惡
起剪燭花香炷
落儂不錯是花一樣春飄泊

醉春風

春嘆

悶雨和愁墜生把花時廢近來整日下簾櫳睡睡香
冷銀囊繡閒鈿尺只供憔悴醒夢難迴避淒涼剛一
味從今真正不思量諄諄心系教枯淚痕成積枉然
空費

久陰

最是鳴鳩橫硬與花成訟摧殘萬片葬新泥痛痛痛屏
曲香慵簾旌膩逼冷雲無縫未把愁來送又把愁來

種無聊覓得却愁方夢夢夢白墮三升黑甜一枕討他閒空

天仙子

第二體

立夏

酒惡更嗔花氣裊起把落花和露掃黃鸝一箇上枝頭
來報道添煩惱今日五更春去了倦眼舒將煙渺渺
是處溪山今綠遶却拈短棹問桃源非故道人間杳繁
陰如雨無啼鳥

千秋歲

用永叔第二體

廣陵臘月念八日

是月小盡

愁城無外就裏還無內多情伴我能無懈霜尖鑪火弱
風閃燈光碎鴈過也聲聲淒苦真同派道力愁中耐
仙骨愁中蛻星宿劫愁難壞夢孤身怯影圍減腰憎帶
笑明朝一年又去愁還在

星宿劫出華嚴經言多也

隔簾聽

遲阿秀不即至為西樵司勲賦

看綻燭花雙蒂吐
辦人剛到羅幃笑揭聲還悄悄問
檀郎為儂懊惱漏盡了怎和衣枕頭歪靠忙相抱
檀郎輕笑試向卿卿道如年永夜銅壺杳聽來偏錯故將
人攪未天曉明朝細和伊表

剔銀燈

冬日敬亭讌集止宿

趁得晴郊淡蕩好
載向筍輿數兩一線湖光四圍林影
襯出晚霞如絳扶筇山頂便摘取絳霞為釀
吟就問

天奇唱直喚醒古人無恙刻燭詩成傾瓢酒竭我輩狂
來差壯明朝重省更笑倒真狂非誑

千秋歲

第二體

為吳爾世母節壽

笑捧霞觴代君陳祝萬歲冰桃今歲熟四海交游歌壽
母三春風物先華屋佇期願褒節孝君家獨 三十七
年貞志篤三十七年庭訓足兼父兼師心更曲當初茹
苦唯熊膽而今色養真仁粟湛夫人百世後留芳躅

踏青遊

清明日同西樵介夫至法海寺

烘日勻風春光著人輕
蒨繡草路泥香成片覓誰儂
和笑走弓鞋初倦更是處
池塘簇蒲拖柳閒殺畫船
歌板把酒樓頭憑闌望中
平行嘆此日春光都賤彩
旗空絨索冷秋千荒院總
聽徹歸途小亭妖曲依舊
楚天雲遠

八六子

挑燈僧舍風雪畏人淒然有塵中之戚

坐僧寮何來風雪欺人牕紙頻敲看壁上橫刀自吼牀
頭斗酒孤傾可憐緼袍是誰潦倒吾曹半枕故鄉離
夢十年流水詩瓢不禁得短鬢恰如秋葉奇雲滅影好
花減片拚向水國幾家漁父煙林一箇山樵興還饒多
他這卷離騷

長調

意難忘

送曹顧菴學士還武塘同用高字

客也無聊況棲遲歲晚風物蕭蕭酒壇差共慰墨陣頗
能豪容笑傲有吾曹壘塊正須澆但輸他青衫濕了還
對檀槽

時覓歌
姬不得

夜闌月小天高更霜華痕重逼向征

袍談深嫌漏急曲緩寄絃么無柰事可憐宵別恨總難
拋怕看來曉江風色似雪寒濤

滿江紅

賦紅白菊花

潤白柔紅都刪去人間顏色訝座上並肩聯袂誰家雙
壁裴令正從粗服好衛郎合向羊車覓判此生飲興伴
伊家千浮白 香黯淡無痕迹影歷亂難收拾看繁英
爛葢萬花如織葉索排當渾勉強花頭打招真蕭瑟問
當年籬下舊風流誰能識

社集又賦紅白菊

是處栽花遍園林尋常蹈襲儘歲月留枝養葉補疎刪
密騷客徒誇英正落人間豈有花能實看如今兩樹占

秋芳成花國 十日坐旃檀席五夜對瓊瑤壁更紅情
不艷白光如拭浸玉寒泉明夜雪助粧金盞酣朝日是
臣髡飲酒最懽時甘千石

夢中飲名酒追憶

名酒招余見尊掌恭而竦立恰醅香到鼻肅然三揖蘭
氣故從幽谷吐露華豈落人間跡笑當年虎魄詫蘭陵
非佳客 髯也隘慳一滴髡也妄誇一石共此公相對
莫言朝夕興發君能傾十斗醉來我願拚千日只李生

一斗百篇詩真無敵

唐朕虞留飲却贈

秋老籬門有高士蕭然獨處倚閒砌孤枝冷葉菊花無
語一畝盡拚衣尚敝三篇賦就饑難煮

朕虞有典
屋詩三首

恰何

來狂客破苔封攜秋雨科頭坐誰賓主掀髯笑堪吾
女正紫螯堆珀綠醕斟乳筆底仙乎君獨步杯中老矣
余千古記醉來還有舊風流樂間舞

燭影搖紅

集飲西樵司勳寓園聽雲然女史度曲分得八

字

鴛瓦霜濃金缸一點么荷燿吳娘匿笑隱紅簾小露蓆
兒摺簾外冰輪碾雪問誰領人間花月緱山仙子謫向
塵中還吹尺八繞徑疎梅凌寒早有幽香接玉人試
與並梅花一樣無分別休把涼州高揭惹多少宮牆偷
摩酒徒腸熱詞客魂消都難安貼

天香

韞林君為余書小青詩卷系以題句見嘅賦此
荅謝

散朗神情幽閒風氣于今閨閣誰匹豪寄魚肌健臨狸
骨釵脚想應斯跡瀾翻千字更首尾精神如一天壤王
郎爭信得墨雲生劈却念才人堪惜莽天公有名無
實三寸管真視萬年雞肋自笑填詞空老難寫盡青衫
舊消息何意書生佳人能識

夏初臨

為王司勳題水晶簾下看梳頭圖

蕭靈
曦畫

悄意難描幽情誰見久無人賦雙文梧影單衫閒中驗
取腰身蕭生作意經營寫濃香不著些顰曾波橫溜淺
櫻忍笑活現伊人書簾小暇粧閣清懽釵邊翠滑鏡
裏紅分歌床凝睇心苗全染幽芬道不銷魂相看處遞
盡溫存問真真他年好憶月想花因

同人燕集北郊園亭得西字

柳盡籠風荷能翻水望中竟綠暄萋布席清陰冷香都

上人衣午階花影歲隄共水紋簾子漪漪誰家畫舫惹
殘蛺蝶驚起鳬鷺良朋聚首高唱微言詩攜謝朓談
有張譏人生行樂從知今昔如斯羽竿頻飛卷迴波勸
玉東西儘遲遲歸筇好踏煙路迷離

念奴嬌

江上憶

犁煙雙漿向江頭載滿春舟愁緒明月琉璃千萬頃驚
起棲鴉無序香字初溫燭花還剔此際人何處夢魂相

逐無端又被鶯誤
憶得晚閣輕寒簾前瞥見便欲留
郎住一翦秋眸羞欲滴扯著簾衣故故多事輕帆無情
流水特地催將去淒風惹恨孤舟不道相怨

八月念四夜采石舟中

長江正寫問江流此水何年淘淨露冷三更剛掛起悄
悄半輪明鏡桂子無聲秋情零落起把孤舫凭闌干北
斗夜潮最入清聽
嘆息半載征鞭愁予渺渺耐有江
山勝擊節高歌杯酒裏短劍彈來霜勁千山一人

一月此意堪誰贈青蓮何在扣榜呼之如應

三月三十日

春光如夢還如雨併作將歸消息一片飛花千縷恨星
斷遊絲千尺蝶味都闌鳥聲無賴狼藉難收拾頻看日
影今朝生怕昏黑拚待守住今宵為春奏請願討留
春勅爭奈花枝都瘦了樹樹綠衣新織脂合香銷膽瓶
色褪也去無踪跡不如野草青青沒些知識

題山語雨花臺看雲小幅

山中住久有粟留枝上時時來伴潔日疎風天氣好坐
向綠陰嬌喚午後微涼一簾幽夢清迥無拘管起來閒
步泉花恰注茶椀 雨花臺上看雲丹黃青碧萬里奇
光滿非色非空無定相未可作雲霞觀我把虛空攝歸
九墨貯向山公腕冥然靜坐長天明月如盞

送孫無言歸黃山次曹學士王司勳韻

黃山家者見多少虛名唯君稱絕閱盡人間風景惡苦
憶山中喚鐵詩癖能耽詞情獨賞嘯匹因霄舌焙山者

海安貧肯與同轍 已辦剝苧為衫編柳成笠衣履全

然別道是煙花隋苑冷螢火何曾真熱富自當求吾從

吾好誰巧誰云拙朱砂峰頂接天萬仞紅雪

喚鐵郭休
隱太白山

事因霄國名
其人善嘯

小春紅橋園子讌集同限一屋韻

時有魚較
書在座

尋常歌舞侈華筵是處爭誇金谷我向人間徵盛事除

是咳珠唾玉才子詞壇佳人酒坐香煖花光覆一觴一

咏不須絃管絲竹 幾折鴈齒斜橋畫簾輕櫂游冶驚

人目併入酒腸成好句十指酒香拂拂彩筆紛飛寒濤
卷起怒欲來崩屋笑余寸管中書君老而禿

次曹顧菴學士韻述懷奉荅

菰蒲埋首難重訴長語音如哀筑窮鳥枯魚自嬾慢相
成人誰題目蜀道行難燕歌氣盡書又無兒讀酒中狂
笑屠門大嚼無肉莫問歌吹揚州自竹西人散況籬
邊菊何事中郎還未絕取遂會稽東屋老大頭顱半生
儘消受無能粥粥餘酣腸熱醉中亂品橫竹

趙元叔作
窮鳥賦下

士蔚作
枯魚賦

次顧菴韻送朱近修還海昌吳西崖往山陰兼
懷宋旣逌先還吳門

蒼淒林莽度征鴻正是高空秋肅瑟瑟水天蘆荻岬愁
殺布帆雙逐越海雲沉吳江楓冷何處扁舟宿青山入
眼浮螺不似新沐廿載鹿獨江臯黃塵濁酒霜雪紛
山麓此日追陪羣彥後覺穢在前珠玉芒屨難歸貂裘
盡敝夢裏梅花屋頻搔短鬢婆娑不堪簪菊

次學士即席韻兼呈宋荔裳觀察王西樵司勳
詞壇宿將覺秦歐辛陸今無難續壁壘當場爭上駟我
拜祝眇三覆劍戟無聲殺人如草手得中原鹿回看餘
子與其書不能讀笑我手拙髯枯牢愁難寫倚馬慚
枚叔描畫蓬蒿只辦得潦倒山癯半幅食力居貧隱安
遺躅空有江湖屋先生不棄許余同餐秋菊

次其年韻戲東西樵司勳

鈿車初下見珮聲纔杳杳塵猶綠翡翠簾深穩護住十

二屏風曲曲金縷裙襦水仙薰透春暖香盈斛爭籌打
馬紅牕聽賽盧犢誰信霜冷籬門蕉黃空似紙有愁
難錄認是桃源迷去路冷隔千溪寒玉想像雲然非煙
能擬秀奪三秋菊重來覓晤臣當三薰三沐

周姬名秀
字雲然

送家季其年歸陽羨用顧菴東西樵其年長調

先成韻

年來懷抱拚剪愁作片織愁成幅如許乾坤供好事難
著半間茅屋酒暖歌深只供憔悴况此顛毛禿翻翻徑

起槃間自舞瞿谷 幾日剪燭寒牕恰別離又迫離情
盈掬醉裏烏烏歌老驥聲咽唾壺如木湖海飄零胡琴
空碎此意非君獨片帆漸遠斷江一片黃竹

讀孫介夫文鈔賦贈

文壇飛將向人間橫視誰堪牙纛江左孫郎陡頓使一
霎曹劉手縮壁壘霜嚴旌旗電燿歐柳還臣僕同人僉
曰斯言受者無恧 年來好手能多驅無言煙黛恣搖
毫牘倚市逢年何處辨此道明珠魚目掌握靈蛇宵藏

繡虎兩者君俱足先生大笑療貧都未堪鬻

懷宗梅岑表弟兼柬鶴問

淒然回首舊揚州曾見幾家華屋二十餘年剛付與一
片寒笳代馱屏跡隋墟轉蓬梁苑空負琳琅玉坐而須
老此生過在誰孰嗟余久矣飄零牢愁成句不可人
間讀媿殺前賢稱宅相駕馬秀騏齊于泥水相逢須眉
非昔還向窮途哭君來就我澆寒且索醺醪庾闡詩朔
障裂寒笳

水原嘶代馱鶴問新自中州歸易林失其利
祿過在誰孰顏延之赭白馬賦秀騏齊于

訊孫豹人移居

彈琴讀易便北山土窟高眠真足身外無多要置頓床
上之書連屋十頃簞簞挫廉願志好擬逃于竹蓬蒿滿
宅未荒還有松菊最是此事難期天公之判斷吾曹
方酷何物書生而妄冀如此容容多福二頃田無三間
屋老羊也籬空觸一頭牛在露車故堪常宿

同范汝受旅病戲遣

蕭寥僧舍筭兩人佳趣窮愁千斛立躋行僵無是處鬼

曰其窮未足二豎擲膏肓可據共煽窮愁獨看教疋
瘠歌床而捫枯腹也只幾首新詞描愁寫怨便折平
生福誰者中黃真起痼一七不勞參茯雞距能花魚腸
自吼起舞何須蹴吐來而鬼乃以余為形枯

白香山有雞距筆賦

期紅兒不至又東司勳

魚箋難寄竟看朱成碧視丹如綠熒熒明霞全化做一
片冷雲成簇楓葉無姿蕉花不吐黯淡闌干曲杜鰲此
日羅虬應判千幅說甚記曲簾前相思蠻豆按著如

枯木況是楚雲消息杳光彩空勞翠燭無葉能傳有絲
莫繫謊殺氤氲讀卜歡散子滿盆隻隻三六

郭遐卿贈
嵇叔夜詩

心之憂矣視丹如
綠時雲然未回

次李希韓留飲韻兼送其暫歸

悲歌當泣向酒徒市上共君擊筑酒椀淋漓成墨潘
出龍蛇千幅如此才峯逼人疊疊未是淮南獨嗟余老
矣藉君同逐秦鹿正此酒境詞情好望衡對宇吸僧
寮粥無那布帆風又飽曉向寒霜僕僕勾當來時錦囊

應滿先索新詞讀傷心最是唱陽關不成曲

解語花

花燭詞

柳知偷眼梅待吹唇熨袖風痕皺碧紗牕裏薰雲錦恰
恰早春時候十二紅燈剛捧出步搖香溜爭誇道天上
神仙來作人間偶 暢好月明如晝索存存欸欸著意
消受銅龍初漏卿當倦紅燭影沉知否文鴛並宿得多
少玉偎花逗祝二喬攜手蘭堂紫麝雛雙授

木蘭花慢

第三體

泛舟夜歸

漾澄湖淨綠吹乍皺熨難平算如許春光花朝花夕花
雨花晴年年不教孤負幾閒人於此費經營逞盡鶯花
伎倆獎成風月聲名 木蘭鰈子小于兒隨處有居停
但曲谿暫泊招雲可落呼鳥能應紅塵半生勞攘回首
來醒夢總難憑便好乘風飛去瑤天星斗晶晶

霓裳中序第一

為歌姬楚雲作

嫦娥怯清影，暫別蓬山下。塵境來作春風管，領儘玉艷。
香柔柳慵花暝，當筵自逞。問阿誰兒女，能並除非是飛。
瓊瑤闕，唱步虛幽冷。夜永落花無定，更纖月流雲都。
凝畫堂雙燭，相映有萬顆。真珠飛光圓瑩，怎嬌花情性。
蚤占了歌場曲聖，書生句雪兒知否，笑未堪留贈。

瑤花

看繡毬作次司勳韻

瓊花歇後簇玉圍珠未敢誇無價八仙小派儘放春過
去守他新夏銷紅成翠直今日花神纔暇把碎瑤細劃
玲瓏點染月明涼夜 曾傳玉蘂當年碧筩散冰絲鬚
粟芬射仙姬也向人間戲角扇雲冠低亞玉峰赴約嘆
自此蕃釀難借待醉深夢到仙家立馬藏花洞下
唐嚴
休復

玉蘂花詩有笑對
藏花洞裏人之句

二郎神

為李雲田題周少君寶鑑坐月浣花圖

何來周昉偷出深閨一罇除繡帖鍼牀兒女事都閣起
莫侵筆架月冷花慵春漏永冷落煞一枝低亞雛婢狡
香泉夜灌特地閨中消暇 兜荅月尖露重寒侵羅襪
便把酒酹花花不語應嘆息有人佻達蕩子不歸還獨
守是誰道春宵無價畫圖上人間多少傷心作風流話
解連環

次顧同束懷舊原韻

此身無託笑乾坤窄小可人難作二十年奔走天涯見

山苦水淒酒窮詩惡往事都非休提起綠窗絃索恰夢
回霜曉陡地傷心舊日樓閣茅山已無妙藥縱魂縈
海渚身繫天角枉積下恨跡情踪待疊起相思又難拋
却百轉迴腸鎮日夜全無安泊總我伊文魔情孽應同
淪落

一萼紅

四月十日西樵司勳約過袁園看牡丹作

客懷多儘酒澆不盡無計與騰那草欲迷天花全卸地

人間花草蹉跎已發付春光九十渾忘

去聲

却百日等閒

過燕語分明怨春殘了沒法樓羅 踏向惜惜園子問

花王消息百五如何榴瓣能殷瓜瓢故淺午酣香影婆

娖遍坐裏酒香花氣寒錦幄花也顏酡空惹天香歸去

冷熨衾窩

白牡丹寒食時開名百五花榴瓣瓜瓢俱園中牡丹名

內家嬌

幽情

相逢攜手覩今何夕仔細問卿卿是綵繒能真畫中形

現蘅蕪在握夢裏逢迎重攜手移燈端翠鈿促膝彈香
纓一尺柳絲瘦來有幾兩痕山影淡了還曾別時渾
似醉愁中意今宵此際纔醒當日心煙對裊目語雙成
謝天公判斷幽懽許結花神擁護癡想教靈多少相思
證據說與星星

憶見

香風吹欲去都應是憨態玉難支記嬌要倚人兩鬟低
處笑佯看影半步回時魂銷盡痕脂蘭襲襲束素柳絲

絲歌到有情
羣鬆多少舞
餘無力鞦
韆褪些兒
幾回新
聲度嬌眸
轉依約如
有微詞愁
煞司空常
見輕簡芳
姿誰攜來
繡幙鑪煙
護者貯將
金屋詩卷
酬之只怕
書生分薄
端又參差

席上

歡場多少憶
難忘得舞
艷與歌香
記雲影細
沉脂檀微
辨風絲輕
貼絳白相
將曾賒取
酒城天不
曉詞陣字
俱雙末利
露胎涼過
晚髻芙蓉
霞繡水剪
秋暉而今
拋

卷十五
棄也廿年裏儘教著意郎當那更個人無賴逗起愁腸
正金釵已溜花無管束錦襴欲褪月有平章又是彌天
恨緒大費商量

沁園春

客中將發

行路徒嗟歸與難賦此去何之憶窻櫺側畔梅花已雪
闌干左右楊柳堪絲數幅煙霞滿牀書卷魂夢安排在
幾時還自笑總閒拋好月空負新詩如今喚醒相思

切莫要燈前唱舊詞儘冷雪一肩寶刀尺尺煖雲千里
美酒卮卮竹杖攜將芒鞋踏遍山水風流十萬賢春遊
飽再茅檐故國坐老于斯

浣手繡觀音

帶露拈花迎涼支鏡日影纔升看爭奇梳插萬千緡直
斬新裁剪四五銖輕一朵楊枝半天鸚鵡舊向慈悲記
許曾紗牕下理青絲三尺水月泓澄金針拈處盈盈
頻盥手金盆纖指擎願石麟佛許宜男入夢並頭蓮證

再世同盟淨室皈依名香供養三月持齋特記清郎癡

絕偏偎人憨謔昨夜虔誠

俗持觀音齋者以正五九月

同女伴互道小名

繡帖鍼慵篆篝煙膩春困曹騰恰踏青姊妹歸來鬪茗
學書隣女央與調笙並影生憐偷閒覓會總把風流各
自矜嬉遊罷更量鞋比髻一樣心情相攜坐近紅櫺
把乳字和伊叫一聲笑夢中忙應曾聞郎喚簾前低說
生怕人聽阿姊頻催小姑偏澁吐向唇邊已面頰重相

問莫他時懽會叫出還生

裁白紵作春衫

較量寒消排當花了恰值清閒已攜將小妹繡翻異本
教他雛婢香揀深斑重幙須褰脫綿正可莫任春光漸
漸闌紅氍列早龍珠麟首金粟同安 哀牢細織蘭干
慢剪破秋江浪幾灣任退紅水碧都嫌色膩輕容方目
且放紗單一抹雙心兩當八撮曾入詩人體貼問裁縫

就正佳人麗服風日躋攀

潘炕姬解愁有雙龍奪珠之
剪姚月華熨斗名麟首金粟

尺名後漢書哀牢夷蘭干細布注云蘭干紵也
輕容方目俱紗名一抹二句出王筠裁衣曲

美人背

乍試春衫問人宜稱側轉腰身怕油侵燕尾承雲樣巧
釵盤鴟翅半臂紅湮羞際難回嗔時別坐輕拍頻摩要
倍溫窺私浴見膚光占燭面覩無因內人破睡傷春
向周昉圖中寫欠伸記被池寒入妹勾牢擁枕稜香逼
郎手時循下砌尋花入簾避客去處風流一樣勻橫陳
夜羨築脂刻玉方後尤珍

承雲衣領名占燭合德事周
昉有背面內人欠伸圖規前

方後秘
辛語

美人曾

桂領低分襦襟鬆解薌澤微微有阿婆憐重麝檀幼啗
郎君情泥輔體交靡文釦都弛紅紗不隔貼向人懷選
夢宜相思結問貯來多少中欸無疑仙娥寶袜尤奇
試束與歡身疾頓離况酥融脂凝寒堪暖手花嬉玉樂
席號香肌菽乳微捫蕙心同捧玉燕曾教夢裏攜蓮花

帶偶赤珠夜繫爭訝朝暉

欸中散姚月華事寶祿謝
長裾事蓮花帶吳絳仙事

題其年烏絲集

此日相逢文選樓頭瑤花榭邊有累朝麗句舊傳鄴架
一枝仙蓋獨種藍田詩正而葩玉溫而栗幻作髯之絕
妙篇人還羨讀元龍湖海百尺高寒風流絕處能傳
看寫向烏絲字字妍見紅牙度者又名玉樹綠腰譜了
不讓金荃多少才人百千聲調屈指能爭幾箇先雲郎
道是兒家捧硯染作雲煙

送沈方鄴歸宣城兼示蔣大鴻

句宛溪聲敬亭山色近復佳麼記秋深楓榭芒屨遍踏
春先梅柳藤杖頻過懷謝空存玉笙重到此日人間感
慨多還堪笑是君來邗上一樣蹉跎繁華久已消磨
只些小紅橋寄咏歌賴羣公高唱特開風景妖姬小曲
為點煙波語笑方酣離情又起短鬢看來黑幾何君行
矣向蔣生傳語蚤整歸舸

謝懷閣沈公綏讀書處王氏玉笙園在其側余甲申寓也

乙巳丙午
又寓此

春風裊娜

壽西樵司勳同果菴梅岑方石瑤田賦

世間閒日月甚處能長碁半局海生霜醉山公偏記釀
王事業小槽紅滴就臥何妨推枕聞炊結茅量笏屏當
精廬花正忙仙格中人故超詣風塵外物自清章却
憶揚州煙景客懷無那安排向春海茫茫歌串細領巾
香宜餐秀色合付王昌看欲笑時閒情體貼正無人處
密意商量蓬壺非遠便雙成瑤闕酒粘花壓應也相當

白苧

贈階前老少年

小屏中覺布被微涼
浙浙紙窗未啟
早見晴光窺隙却
原來西風一夜吹空
碧花草悅新秋
總淨葉柔枝
懽適切切吟蟲吟而清而不激
有感慨之人無語當階立
深惜盈階秋意染絳勻黃
供人鑒賞博个少年相識
誰知道已把壯時虛擲
如今老大纔和秋海棠一般
裝飾只有霜深那時楓葉
知他踪跡多少閒愁除酒
難消得

蘭陵王

憶舊

晚潮急堆起淒涼萬尺人何處曾憶往年謾把歡娛付
輕擲如今空恨積無計迴腸熨直單消受零怨碎愁只
似蛛絲費空織 休提舊消息已衾涼蘭吹徑迷蓮跡
輕風涼月秋衫碧記柔調歌板細拈牌葉斷魂都盡總
值得也拚到今日 悲憶頓成昔怎俏意如鐫芳踪難
覓連天野草天無極料不許絲斷後還重緝除非來夢
夢兒裏問他真實

大酺

寄友

簡點征衫秋風裏老了幾多行客江頭鴻鴈起聽一聲
哀怨蓼花都白香冷衾絲夢紫衫帶粘得柔腸窄窄愁
魂無可寄覓醉鄉深處暫尋家宅奈消恨無方刪情不
盡最難安拍 前時明月色單一味慘淡和蕭瑟偏又
向枕函偷覷屋角輕移等閒間傷人心魄別緒嗟匆迫
歡娛事杳然如隔料伊處情難勞更闌月轉陡地風驚

簾額夜情怎生捉搦

多麗

冬日敬亭讌集止宿

試放眼此地名山多少儘古今酒徒詞客竒懷著意搜
討倚高樓無言靜對伴孤雲看盡飛鳥落照金波初瞰
翠霧一彈指頃人間昏曉起高歌四山響徹葉下寒林
悄休回首青蓮陳跡余懷淒渺嘆醉裏江山還大醒
來天地都小便乞向青山埋骨不足以娛吾身老且與

諸公同傾酒醖樂遊母負風光好下山路冷雲斜日十里田間遶偶然事使後來人羨此鴻爪

稍遍

用東坡春情
體作哨非

次董文友韻送孫無言歸黃山

洞裏百花洞外錦霞採藥真生計便千年高臥翠微中
再相傳桃源天地石方床蘧蘧睡足松泉互引不曉紅
塵世任道迷黃農教通樓導真人大笑不已却俗緣未
了復驅饑况嫁娶都完更為誰編草為裳披髮自覆先

生倦矣 自初向塵中著脚曾與青松誓困芒鞋也懷
猿憶鶴豈無淚千里外家山煙雲飄渺容成去後無碑
記六六奇峰洞天三八年來直西南視已擔頭卷軸足
堪清憇笑竹裏高人總好名乞然箕踞何庸避從今脩
脩徑往酌水餐松子遙聽半嶺啣然振響異哉嘯分處
士霎時黃海湧波濤但漫天雲蒸霞起百花錦霞黃山二洞名述黃農
之道棲神導氣編草披髮乞然箕踞俱孫登事

十五家詞卷十五

欽定四庫全書

十五家詞卷十六

休寧孫默編

黃永溪南詞上

序文

予少習為詞每以歐晏秦黃為正風最後讀南宋諸家詞乃知能擺落故態而意氣跌宕者惟陸務觀為善能自道其與馳騁上下者庶幾子瞻幼安其人乎而務觀自序乃云少有所為晚而悔之然猶未能止

者何也豈非樂府歌謠之變固非此不足以抒永言
發逸思耶吾友艾菴黃子於文筆無所不工少為詩
餘頗有工妙之致年來縱筆為詞嶽崎歷落洋洋纒
纒有不知其然而然者余以為非渭南老人不能如
此超逸獨至也嗟乎詞雖小道本乎性情中乎音節
固有繫乎時與遇者焉方黃子少時故有閨房之好
自相唱和所著小詩流傳里巷間無不述為佳事既
而偕其季弟初子與余輩數人常為文酒之會單詞

小令悉被管絃筆墨所至皆有低徊宛轉之思斯時
也亦可謂極人間之快意矣未幾而登上第佐西曹
此樂既不可得而又以清賦之累與余等共遭放廢
艾菴遂寄跡戴溪之南小妻稚子優游卒歲機杼之
聲與絃誦時相間也暇則從野夫牧子較量晴雨間
為小詞衝胸而出矢口而成一再行吟浩浩乎如出
金石自以為釣天廣樂不過如是此豈務觀所云漁
歌菱唱不能自止者歟昔唐李花間諸集流宕可喜

而務觀則謂士大夫無聊所寄世有能知艾菴者誦其詞而想見其意勿以為僅出於無聊焉斯可矣

小令

調笑令

涼夜

明月明月偏向紗窗偷入有人遙避清光小怯羅衣夜
涼涼夜涼夜報道海棠初謝

無寐無寐影與月兒相對闌干十二重重長立西窗曉

鐘鐘曉鐘曉露濕鳳頭香小

如夢令

春朝旅店風雪

既是雪花飄泊又是孟婆作惡左酒右持螯仔細與春
酬酢行樂行樂以此勸春春諾

把酒央春寄語風伯雨師權恕籬戶矮於人饑雀寒鴉
相覩何處何處春又翻然曰去

醉公子

燈花

喜向燈花問知道明朝怎果有一函來從頭讀幾迴
半是糝糊話忽把燈花罵呼鴈過雲邊回他没字箋

毛申人新婚未幾卽赴文友通宵之宴戲速其
行

好酒無多飲歸去尤宜醒珍重勸郎行官街風露清
銀缸人獨倚月色居然起侍婢正商量郎來莫恁狂

反董文友詞

姐姐和儂戲索解書中意書是合歡書公然不避予

小篆硃痕沁誤讀鴛鴦印姐面一時紅原來合避儂

原詞

云儂心何事惱姐姐欺儂小
偷看合歡書憎儂問起居

昭君怨

螢

剛是沿溪飄泊忽又隨風前却暗地恁相誇可憐他
那個輕紈兜住何處碧紗籠去到處只惺惺却輸卿

蝴蝶

是蝶是周難據疑夢疑醒何處花底忒輕狂一雙雙
偷得香來韓掾傳却粉來何晏那個是前身兩平分

點絳脣

小閣

夏日方長科頭羽扇頻來往小亭幽敞茶沸松風響
隔岸垂楊對坐黃鸝講還堪賞簾鉤初上款乃漁翁漿

浣溪紗

初見

曾向蓬山頂上行
瑤姬十五笑相迎
湘裙剪剪襪盈盈
今世芳名知弄玉
前身小字是雙成
怪郎驚地喚卿卿

贈妓蓋珍

昨夜蓬萊駕紫煙
天風吹下蓋珠仙
十分珍重破瓜年
對客離披渾似醉
為郎顛倒不成眠
秋波斜溜恨無邊

幼女曜貞生日

初着紅衫襯薄綃
爺前萬福出簾腰
道兒生日是今朝
杜老瘦妻誰耐學
左家小女恁般嬌
看爺白髮早飄蕭

卜筮子

有感四首

匿影住人間
橫眼看天下
都道乾坤一腐儒
自問何為者
得酒且高歌
無酒干休罷
若有留髭送客人
一石臣能也

壯已不如人老矣何須問縱有因人成事時錄錄悲公
等新態看來多舊事提他怎那個邯鄲道上行僕僕
何時醒

種李易成蹊種豆將盈頃婦不彈絲妾不歌有酒如何
飲山色碧於藍湖水明如鏡皓月清風是等閒權與
儂相領

流水遶孤村問是誰家住不信孤山處士來別有梅花
墅客到我應懽我醉君須恕多少園亭沒主人道不

如歸去

湯陰謁岳武穆廟

身在尚無家身死家何地縱使游魂遍九州不向湯陰
住有恨化為雲無淚飛成雨若變啼鵑何處歸趙氏
孤兒處

醜奴兒令

溪邊小閣聽雨

溪邊三尺翻盆雨閣下灘聲閣上風聲那管愁人徹夜

聽 想來溪水添多少
昨阻舟行今送人行
安穩漁翁
掛綠罾

菩薩蠻

觀稼

數間茅屋臨溪路
無人小艇從人渡
一望野橋煙陶家
種秫田
午前風日暖
幾路腰鎌緩
短帽窄衫人招呼
三兩聲

自梁莊策蹇至海陵

瘦驢打過溪橋去麥芽初長青無緒四野濕雲濃天如
中酒翁石尤風太急澗淺波文織山色過江稀前途
怕雪飛

讀漱玉詞

易安居士偏瀟灑片言落紙真無價應是謫仙人青蓮
認後身可憐還再嫁未了塵緣債衣上舊茶痕看來
莫斷魂

小女

左家織素年還未採花自挿如九髻採罷怕娘嗔拈花
却避人小窓陪綉婢有事心頭記要拌雪獨餐溪邊
弄釣竿

添字昭君怨

用唐解元五更風雨葬西施句為聘姬姍姍悼

亡

花信欲開還住春信欲歸難駐五更風雨忽來時葬西
施何日花前懽會空想花容憔悴花亡可有哭花人

問花神

春朝大霧

今日是春來日何故煙霏霧結想防春色到兒家去迷
他或者是春來日故使霧迎煙接知春還有幾多程
問他聲

減字木蘭花

畫欄

微雲如畫畫欄小影低相亞樹氣花香半是梧桐半海

棠
瓊宮露冷天上玉妃眠未醒愁絕王孫立盡三更
月又渾

憶舊

風風雨雨二十四橋儂望處玉佩丁東翡翠屏間醉小
紅揚州歌吹別院笙簫花底媚人在黃昏金鴨香消
半掩門

尋花

夢魂蕭灑化為蝴蝶尋花也花更無端怪殺花名有合

歡 急圖夢醒牆外風來花弄影喚取雙鬟且向花邊
打蝶還

送文友省親襄陽

輕舟弱水七十二峰將至矣若到襄川一度寒暄孟浩
然 霜華如片昨夜高堂應夢見此後斑衣應傍山公
白接羅

盱眙殘雪

多才春雪點染山川真妙絕剩粉零丹猶襯長途月色

寒 陡然日出雪應能剩三之一日上山時日又居然
好畫師

趙真還先生別號半僧索贈

名于何自云俗云僧俱未是甚事名曾仍舊還他號半
僧 依然一我喚馬呼牛無不可若說先生還筭無名
是的名

生日

當年四十走馬長安衝雨雪又五年來寥落柴門酒一

杯從今以後樵斧漁罾都製就
三兩村翁快活青山綠水中

清平樂

磁州曉起見床頭積雪

霏霏春雪夜半床頭積
天女怪君春夢熱碾碎玉花輕
擲曉來對影盤桓無聊猶倚闌
干誰是聯吟謝女居
然高臥袁安

更漏子

春去

怕春來愁春去分付黃鸝畱住畱不住
愁還行黃鸝三兩聲絮如飛花又落
人在畫樓香閣空自惜有誰憐
春風年復年

畫堂春

新月和韵

夕陽隱隱柳梢頭隔林紅暈西洲
回看天外子陵鉤鈞起新愁
何處長褰羅幙有人獨倚
高樓新愁又怕舊

愁畱一筆輕勾

武陵春

乍雨乍晴

為怕日光爭欲雨
雨過日偏明
半攔斜照忽雷聲
晴雨總無憑
却似蕭郎多薄倖
歸去又還行
薄倖從天教得成
天也忒無情

山花子

夏詞

獨上簾鉤看月明閒停小扇白羅輕習習春風吹不斷
翠荷擎 避煖長拋金鴨火卸粧驚溜玉釵聲早是侍
兒能解意展桃笙

柳梢青

郭石公示古瓢居葉韵新詩集句

曾記飄僊飛觴相屬潑墨聯篇豈是袁妖偶然賀鬼忽
爾摩禪 而今佳話頻傳淋漓向烏絲畫牋選韵撩人
吟詩過日集句銷閒

西江月

磁州道中望雪

浮白隨天上下晴光與日戈矛鋪開白玉觀神州放出
驕驍馳驟鷺影飛來若失鶴羣歸去疑畱江村一寸
望中浮潦倒怨先時候

醉花陰

薄寒

西風側側輕寒度細雨連晨暮試去倚闌看花底垂垂

畱作黃昏露 自携一卷當窓坐
燕掠花梢過 屨響是何人
小婢擎來半臂須添箇

賣花聲

薄醉

昨夜月如鉤 經過樓頭盡屏小
飲篆煙浮 薄醉日高慵
未醒清露晨流 無力壓香裯
睂微秋檀郎無計暗
綢繆 意外玉奴催未得半晌遲畱

銅雀臺

拊掌說曹公天下英雄秦皇漢武畧相同豪舉今朝堪
想見銅雀春風金碧嵌瑤宮鎖翠圍紅虬髯如戟字
當中只有二喬空佇望虎視江東

長店訪劉峻度寓中適遇方孝標兄弟以清風
鎮宋娟詩見示

佳句不堪聽墨跡猶新章臺今屬叱將軍相對厭厭空
歎息幾箇書生五嶽忽峻嶒此恨難平座中摩勒問
何人願署風流新院主牛耳鴛盟

自序曰娟本良家子
流落平康曾與嘉善

曹子顧結盟西湖出方孝標所書扇以贈王師南征
捐彼掠過清風店從將士聞省錄知子顧孝標俱登賢
書將入京應禮部試故畱詩以待

鷓鴣天

閨咏

晚掠雲鬟上翠樓腰肢嬌小不勝秋明知無夢挑燈立
暗欲窺人趁月遊新解恨舊無愁忽驚語笑却回頭
原來姊妹偏相惹說起兒郎滿面羞

河傳

報國寺松

如組如舞卑枝伏蠖高枝蹲虎夕陽楚楚畫出影兒相
賭筆力空今古 公孫劍舞張顛墨堪相正千載成三
絕煙如縈雲如迎一更鐘定野鴉鳴

虞美人

訪妓

飛瓊小字誰拈破何事人間墮鸚哥喚出倍堪憐又怕
東風且下水晶簾 青螺未結濃雲裏香入菱花小知

伊新恨在眉頭只是對人強說不曾愁

今宵

今宵好景誰同坐月與卿和我我愁卿病只高眠丟下
一庭明月煞堪憐迴廊寂寂懷人處月也丟人去待
他人共月圓時好與花前長醉合歡卮

鵲橋仙

七夕

雲幃已掛月璫初飾想是相逢時節一年三百日相思

怕會面依然羞澁
今宵迎晤明朝送別
烏鵲橋邊獨立
不如索性學姮娥
拚夜夜廣寒孤寂

瑞鷓鴣

舉第三子亮可

病中心緒懶如絲
偶讀陶公數首詩
既見其生寔欲可
此情却笑兩同之
廣將園圃誠多事
欲付琴書念亦癡
但願早知梨與栗
得如元亮五男兒

南鄉子

官軍護獻元兎

汝兎產何方名壓文麟駕彩凰
萬里君門先得到禎祥
遙望紅雲捧玉皇
富貴埒侯王寶馬雕籠染御香
一語煩君傳帝里
傍徨作賦相如尚路旁

九日卽事

秋日麗平臯萬里青煙九點飄
獨倚元龍樓百尺纖毫
一雁翻空試羽毛
有客敢題糕漫許詩中一世豪興
比龍山應較好
酩酊細看茱萸弄晚嬌

揮手約吾徒爛醉東籬興有無酒盡故人還送否提壺
紅葉村中那處沽高閣眺平蕪滿目風煙一畫圖何
處健兒身手滑招呼匹馬山頭控僕姑

醉落魄

本意

忽然相遇細君斗酒旋呼取携來痛飲花深處我醉須
眠卿且歸家去嗟嗟無計支身住一天風露星光墜
小鬟驚報忙來覩紅袖雙扶捧入鴛鴦被

梅花引

本意

春風吹春事，纔破臘梅花。次第開，暗香催。暗香催雪滿，
舊山何如此地栽。銀箏誰弄梅花曲，金樽誰倒梅花
谷。莫停杯，莫停杯。家在醉鄉，相期歸去來。

惜分釵

輿夢初醒雪月交明

輿夢冷人初醒，駢駢月裏，征人影。月來時，夢回時，一似

徂東一似徂西棲棲 雪彌望雪相傍月應又在霜之
上雪融時月歸時知是相携知是相離疑疑

中調

蝶戀花

良夜

庭院西風良夜靜小小春光拖逗紅梅醒滿地霜華飄
不定空天踏遍飛鴻影 往日相思閒記省梵字雕欄
有箇人兒並笑拍香肩呼不應薄綿不耐黃昏冷

曉發

瑟瑟西風簾外捲綠水紅村小棹隨流轉葉老欲飛霜
乍染疎星倒向波心糝客枕惺忪寒意憐秋夜偏長
秋夢應偏短何處五鷄聲近遠一九紅吐扶桑暖

雨阻句曲

時時有鉅鹿之行

門外馬嘶天欲曙細雨東來早又畱人住鐵馬丁東簷
際語風飄殘夢香如縷夢自南行人北去南北分馳
却怪還相聚勸夢歸歟愁未許秋江轉眼銷魂處

臨江仙

閨思

疑雨依稀還未雨空階一抹蒼苔孤煙片片欲飛來似
隨風影去復趁曉雲回怪殺鷓鴣啼不住珠簾捲捲
慵開薄情何處暗相猜今年楊柳月舊日菊花杯

一剪梅

輕舟

布帆斜掛木蘭舟身坐輕舟心悟虛舟槐陰風過忽驚

秋天似初秋人比殘秋 傷心何處最高樓十二紅樓
十四青樓年年行李寄他州薄倖揚州飄泊蘇州

雪阻義井

滿地飄殘六出花道是楊花疑是梨花多才賡和屬誰
家謝是詩家李是詞家 少年羈旅若飛花酒泛桃花
曲奏梅花醉看何事足名家大武黃家大俠朱家

破陣子

詠懷

舊掌玉皇香案新叅金馬頑僊錯聽玉笙曾一笑誤盟
鈿盒到人間相逢又幾年醉後新詩數首閒來小令
千篇不賈不農兼不吏宜嘲宜怨又宜顛深眸望遠天

漁家傲

本意

六尺孤蓬搖淥水青簑慣沐三時雨急浪驚風全不理
呼兒語得魚賣向前村裏潑刺錦鱗楊赤尾江湖憔悴
如人比太息收綸魚且去無錢醉一宵婦子醒然睡

漂白

漁人乘小舟以白板貼水面附舟而行又以木槌擊舟使聲不絕魚聞則頭暈自跳

入舟名曰

漂白船

一葦撇破桃花浪
聖將片板隨船漾
擊板船頭魚腦脹

驚莫向錦鱗跳
趁漁家漿
月落潮平初日上
呼兒晒

網垂楊傍
網角丁東風鐵響
閒撫掌人魚悲喜身皆妄

連理枝

早梅和龔瑯琊韵

多少春心聚幾瓣
花開處乍見還疑細
窺應怯聞香且

住縱他時爛熳滿人間權作東風主
往事何堪數九
九繞過五慣歷風霜飽餐冰雪相逢老圃想芳菲容易
到枝頭看纖紅初吐

江城子

元宵苦雨

兒童競鼓鬧新年正喧然盡屏前為甚和風和雨晚廉
纖遙想雲中今夜月人不見暗團圓
有人携手玉闌
邊悄無言恰憑肩且向紅燈綠酒共流連翠袖雙擎私

致語君莫負上元天

千秋歲

早發

曉煙如織猛駕舟如葉雙槳動孤帆揭水聲驚舵尾岸
影移窓隙擡眼望一輪紅吐扶桑日 辜負今番憶容
易前番別清夢醒柔腸結帳垂珠帶遠被冷紅綾摺閒
問取朝來曾過誰家驛

風入松

輕舟

垂楊低映木蘭船
水色碧於煙
乍晴乍雨
垂楊外倩雙
鬟試捲晶簾人
道鴟夷歸去
五湖風景依然
生平壯
志不須憐此意
阿誰邊
前携賓客中間
我後還携舞袖
歌絃恨少輕舟
兩箇羞他富貴
神仙

驀山溪

玉茗樓感舊

重登小閣芳草殘
紅候二十五年
前黯銷魂玉人
携手

暗塵凝壁憔悴幾行詩君知否空回首風捲斜陽驟
追思如夢舊事渾難剖一去兩茫然悵無端前生邂逅
不堪心緒無語對窻紗凭闌久三更後月落梨花瘦

十五家詞卷十六

欽定四庫全書

十五家詞卷十七

休寧孫默編

黃永溪南詞下

長調

滿江紅

讀魏文帝與朝歌令吳質書

才藻翩翩羨幾箇南皮佳客記當日追隨冠珮聯車接
席六博彈碁南館下浮瓜沉李西廊側更輪輿徐向後

園來鳴騶寂 明月轉悲笳
咽清露落哀箏 激看應劉
徐阮詩矛文戟王伯雌雄
知己定文章壇坫盟初熟
歎一朝絃絕為鍾期西風泣

舟中

客與輕刀喜山氣蒼然欲滴
正四月嫩寒輕暖清和時
節垂柳綠藏魚婢穩落花紅
糝鷗兒食問舟中瀟灑是
何人滄浪客 縱一葦凌空
檝看千仞搏風翼望蔚藍
上下水光天色萬里崆峒
豪士劍一聲江海漁人笛知

壯懷銷落在何時吾心惻

即景

急雨狂風頃化作晴空千里纔過眼炎涼反覆誰為為
此人世大都多此態天公作俑何妨爾笑伊家忽喜忽
然悲誠哉鄙 鼓棹去隨波駛叉手立看雲起任英雄
狡獪聞雷喪七放我逍遙春夢外容君千百秋毫裏嘆
人間逝者總如斯徒然耳

自題舊照

率地相看還引鏡，逍然欲笑誰寫作錦衣窄袖入時風。
調一卷長携原似昨，怪翁當日曾英少更可憐捧硯煮
茶人年方妙。容偃蹇湖山靠，聽響屨迴廊繞任小園
爛熳春風花草如此生，平良不惡呼兒早認而翁貌。倘
將來畫出，不堪觀瞻然老。

蛙

汝為公乎抑私也，無端饒舌更何故。池塘青草勞勞通
夕一部鼓吹誰道好，不堪聒耳溪邊立且出門扶杖復

歸來耽吾寂 新月上鳴逾急驟雨過聲如噓嘆汝無
魚樂清非蟬匹水草藏身原自穩身將隱矣何容說笑
吾儕有口亦如卿三緘畢

送王阮亭遷儀部北上

作吏三年似仙去玉鞭西驟看父老攀轅卧轍使君知
否粉署含香風調美玉堂彩筆需君久想金蓮草勅晚
歸來偎紅袖 知頗憶山中友曾醉倒田間酒嘆十年
交態披襟握手戴笠乘車吾與汝九州四海情何有倘

他時相遇或相呼王曰叟

時功令部郎得改詞臣故有玉堂彩筆之句

東籬

歸去來兮恰五載逍遙林外敢自比淵明高致田園瀟灑我自不才明主棄旁人翻訝何為者且悠然採菊復看山東籬下誰問答漁樵話堪語笑妻孥暇只未能免俗酒杯詩債屈子有天何必問楊雄嘲罷無煩解道誰人能狷又能狂吾師也

戲示次內

雖則如雲休認作少年佳麗良不愧村粧野婦短衫椎
髻經卷藥鑪今日事舞裙歌扇從來未想孟光初嫁伯
鸞時居然是手不釋麻和絮目不倦鹽和豉更課兒
書卷課奴機杼我豈忘情絲與竹家無工技邯鄲女只
秋聽蟬噪夏聽鸝吾老矣

小照前瓶荷

茂叔嘗云汝乃是花之君子看幾朵綠莖翠蓋亭亭幽
渚折取一枝聊作供轆轤新挽銀床水問畫圖相向却

何人難相擬 記前日香含蕊忽數瓣紅飄几想來時
憔悴落時容易千古奇冤曾未雪六郎有貌何堪比喜
山翁賦得一行詩為君洗

秋蛩

秋矣悲夫忽到處蛩聲唧唧如助我小窓愁思一何淒
切幾度攪回莊叟夢無端擅踞相如壁自三更擁被五
更來無休歇 豈無故長饒舌縱有恨和誰說但漫空
月影桂香飄屑屬國羈臣南望淚左徒弟子傷心日問

人間多少不平鳴君其一

中秋

玉露初零看上下冰壺清徹端不愧天邊良夜人間佳
節萬里浮雲誰淨掃一輪皓魄凌空出道秋光九十恰
平分當今夕曲欄外疎星列紛桂影飄香屑更彩雲
環映貝宮珠闕何處良遊高興盡廣庭自按霓裳疊想
人生有恨合同圓明如月

壽孫風山四十

駿馬錦衣是當日玉堂年少拂袖去水邊林下携筇長
嘯帝曰病乎非汝棄人呼狂者何妨傲十年前江左舊
孫郎歸來早斑衣舞高堂笑鳩車戲群兒遠更公門
桃李春風繚繞去國不憂鬚髮變入宮尚苦蛾眉好看
身如落葉一般輕容吾老

舟次邂逅程村為尤展成寄同曹顧菴宋旣庭
倡和詞一卷依韵和之

劈面相迎一篙破綠波秋漲憑寄語吳門客到舊遊無

恙貽我一編冰雪句憶君知己雲霄上却仍從一二酒
人游歌相餉似鷗鷺同飄漾誰賓主相賡唱且逢人
作達甕開新釀蠟就一生狂士屐携來九節仙人杖怪
此翁豪氣未全除非吾狀

展成臨去秋波文一篇曾達
世祖章皇帝御覽極加稱

許故有知己
雲霄之句

詠懷和前韵

欲寫我心烏皮几墨濤初漲橫眼看桑田滄海古今無
恙有恨不妨埋地底無愁可寄還天上且曲成數子和

而歌矜相餉 秦楚戰游絲漾遷固筆寒蛩唱任春風
秋雨乾施坤釀月出吳剛空抱斧日斜夸父須投杖覺
媧皇鍊石補天來無完狀

泌水洋洋衡門下雨餘新漲好趺坐釣磯石畔桃花無
恙孺子歌來楊柳外大夫休怨江潭上羨東隣炊黍復
烹雌東菑餉 魚自樂中流漾鳥自喜中林唱有家藏
斗酒山妻曾釀入室漫憂童穉聒中年忍與嬌兒杖問
吾當三十五年前如伊狀

今也何時一之日土膏墳漲還自喜未登麥茁田園無
恙社肉分從里宰後蠻歌劇踞村兒上論功名甘付與
他人從天餉鼓一葉溪邊漾製一曲人前唱任蟻爭
穴徙蜂爭花釀穉子自驅南畝犢老人且策東籬杖倩
誰畱林下一人看閒閒狀

寄懷吳門同好用前韵

長憶蘇州梅花雨錦帆流漲記多少屠兒釣叟起居無
恙擊筑漫從燕市裏吹簫還到吳江上却依然邂逅酒

間豪揮錢餉 鱗諸里斜陽漾要離塚山魃唱聽歌聲
變徵壯心徒釀綠髮向憐西子髮鷄皮忍睹將軍杖恐
他時相遇復相驚頽然狀

聞笛用前韵

修竹如雲誰截似鳳膺微漲橫吹向山青水綠晴空無
恙瀟灑桓伊邀渡處淒涼衛尉空堂上笑何如牛背小
兒豪清音餉 义手看輕鷗漾回首望雛鶯唱任陰晴
天氣日烘霞釀明日相隨田父社前途須避鄰翁杖且

逍遙白眼看他人紛何狀

卓人見過小酌用前韻

白日行吟看幾處圩田銷漲忽一笑相逢二老鬚眉無
恙並坐鼓絃茆舍裏舊時作賦鑾坡上憶中書落筆堵
牆看驚誰餉浪踪跡紅塵淥狂名姓青樓唱且我歌
子和子斟我釀無婦能彈趙女瑟有兒聊代邛州杖說
從來酒聖是毛公觀卿狀

卓人約過安陽山居用前韻

子惠思予放艇去綠帆風漲舊遊處萬松精舍可能無
恙咫尺相看原不厭到時昏黑終須上道炊烟起處有
人家清樽餉潑潑鯉偏搖漾呦呦鹿如隨唱有杜家
遺法百壺清釀我醉欲眠徐穉榻君休莫負安期杖似
王維裴廸輞川遊當年狀

江上感懷

天下滔滔似東去長江無際更萬頃洪濤若練回流欲
沸如此風波行不得褰裳欲往君還未待商量深時宜

厲淺如何仍須揭 浩浩者卿休避硜硜者吾知計似
輕鷗狎水俗鳬游戲擊楫中流歌且嘯驅車九折難乎
易看一帆飛過打魚船心為悸

過訪史順德庸菴途次有作

擊楫中流猛駕起一帆風色渾似昔蒼蒼潏潏九霄摩
翮醉後憶歌燕市缶饑來浪乞柴桑食知使君高誼薄
雲霄曾嗟及 休自比歌魚客還應念同車日也風餐
水宿冷盃殘炙千折黃河晴又雨中秋好月圓還缺且

呼君斗酒向君傾為君說

水調歌頭

流觴

五畝田間宅流水遶逶迤誰歟林外剝啄斗酒問山妻
敢學蘭亭禊飲且作盃湖夜汎觴勺漫提携二叅情未
歇一石醉如泥嗟公等同落落肯栖栖一路浩歌歸
去風月滿前溪人自封侯萬里我自滄浪垂釣去住兩
無疑人生行樂耳富貴更何時

黃河

天下滔滔也逝者盡如斯何故逆流牽挽乎似順流時
一片孤帆隱隱萬里長風浩浩相送渺何之頻聽長年
語神力勉扶持君低詠吾高臥兩相宜閱盡風波人
世此地坦無疑道自昆侖發脉又憶龍門䟽鑿九曲遠
如絲波浪年年有清濁幾人知

滿庭芳

學圃

方欲為農且先學圃舍旁隙地堪犁青青綠竹抽笋傍
簷低都是桃紅李白要添些奴橘梅妻殷勤向東隣乞
取羅列滿牆西怪山翁多事花臺左右插榿編籬有
二三童穉名段名稽自起臨流抱甕長澆灌嫩葢新萸
他年好雙柑斗酒扶杖聽黃鸝

行歌

負手行歌携筇獨嘯閒桑者誰歟古人未往桀溺與
長沮縛就幾間茅屋隨高下種竹栽魚出門見青山當

戶流水遠吾廬 先生今老矣人應棄我我亦憐渠喜
松花作釀細菜堪蕝喚取山妻穉子團圞坐扣缶吹竽
朝朝願花前醕酖此外更何須

鳳凰臺上憶吹簫

別恨

楊柳風多梧桐露落蘭舟初泊方塘正畫樓酒散殘月
微涼多少心頭舊事些兒語刺刺商量聽何處晨鷄啞
啞重剔銀缸 悲傷半醒猶醉看水光天色一派蒼茫

更林鴉鼓翼歎乃漁郎重向石欄干外携紅袖親佩香
囊偷揮淚煙波千里摧折剛腸

玉蝴蝶

當年

記得當年此夜讀書初倦小閣知秋隨意盡欄小飲月
掛新鉤喜新詞繡香題集耽佳話簫鳳名樓最風流小
鬟低報煖熨香裯綢繆離披斜倚玉山無力欲去還
愁戲問檀郎醉鄉何處覓溫柔暗香迷花間蝴蝶清露

滴夢裏蜉蝣儘遲留三更梧雨一枕颼颼

佳人

恰是破瓜時節盈盈十五初嫁王昌六曲屏山如畫玉
照晨張迴清盼芙蓉出水擎素手抹麗生香更消停眉
峰未掃畱待檀郎商量晚粧纔罷衣開蛺蝶裙遶瀟
湘阿母頻催輕移綉屨出前廊愛好多遍詢宜稱矜年
少畧欠端詳又遲疑恐人偷覷着意隄防

念奴嬌

南樓聽笛

南樓暫倚聽何人獨向暮雲吹笛明月空寒千萬里浮
遍一天秋色姑射山頭瑤臺月下此際淒清絕望中見
否駕鯨騎鶴仙客遙想當日知音柯亭妙響千古真
無匹吹破平生蕉鹿夢冷露淋漓獨立衛尉堂前睢陽
樓上過眼都陳迹把杯笑問幾人辜負今夕

別妾

別離誰慣歎今朝舊恨新愁俱積回首蒼茫煙樹遠司

馬青衫應濕馬上征人閨中少婦咫尺分南北笑啼不敢幾回相向猶咽悔却當日多情紅絲牽挽牢綰柔

腸結嫩柳緋桃行樂處過眼蘆花楓葉紅袖擎觴烏絲

覓句何事堪拋擲乍眠還醒瘦驢門外得得

上得字
叶平聲

家敬旃將軍招同彭美門孫雲客宋旣庭家庭表

邀馮校書靜容夜宴

華堂春暖正綺席初開將軍私第名士傾城相際會蓮漏厭厭凡幾觴倒鸕鷀盃傳鸚鵡夜靜魚龍戲笙歌乍

歌清謳檀板方起 忽聽玉勒驕嘶雄心橫發長劍崆
峒倚錦地燈天人既醉指掌山川聚米火樹擎紅帳絲
圍紫暗目佳人語主人解事畱髯送客歸未

同浦八舅過梁溪周羽士精舍宿因憶向曾過
此有南樓聽笛念奴嬌一調今二十餘年矣以
姓名問今羽士不知也因疊前調以為後驗

洞天福地問誰來剥啄昔年狂客二十年前曾一過意
氣鬚眉都別蜀帝啼鵲令威化鶴往事傷心絕依然相

見南樓今夜明月 樓前襟樹零花樓中楚楚幾幅雲
林筆丹竈繩牀仍未改少箇樓頭吹鐵高不勝寒仙乎
欲去待鼓凌風翼瓊宮玉宇盈盈相望咫尺

放歌

吾今安得把長江萬里變成醇酒天下誰醒儂亦醉休
道先生五斗杯裏看蛇蕉間逐鹿時喜時驚走不知有
漢彼哉晉魏何有 可憐古往今來蟻爭鼠鬪誰弱誰
強手劉項功名狐董筆蝴蝶一回莊叟泡滅還生幻成

復破此際無窮否一樽長滿青天明月吾友

金山游眺用夏桂洲韵

振衣千仞便身如遺世超然獨立萬頃銀濤生足下縹
緲片帆風力地下埋金波間浮玉天半撐孤壁釣魚臺
畔一竿煙際孤植巍然砥柱中流人工鬼斧誰捧青
蓮出縱翅扶搖須直上到此長風一息激水三千去天
尺五獨矯翬飛翼扁舟回顧江心一點卷石

中秋舟泊夏鎮與同舟人小飲

扁舟此夜看天邊又是月圓時節萬里浮雲都捲盡高
湧一輪孤潔有客無般有般無酒那得開胸臆青帘搖
漾青銅沾盡三百人間美景良辰人生有幾何事輕
拋擲花自有開還有謝月亦有圓還缺富貴何時少年
易去如水流無息頽然便醉醒來東望將白

桂枝香

秦對崑招同過石公錢礎日顧景行嚴孫友薛
既賜諸子宴集

玉堂金馬正年少歸來風流如畫庭院深深錦席螺盃
初把西園東第人猶在幾冷落騷壇風雅稽康逾懶山
公老去傷心茶話看月落雕闌花下又簫鼓無聲明
珠不夜玉屑霏霏萬斛流泉傾瀉金谷豪華行似夢今
朝重結漁樵社三更打後參橫斗轉蕭然歸罷

水龍吟

夢醒

誰憐對酒長歌頽然醉也無人見醒來何地小窓斜逗

月痕如綫敗紙敲空乍寒擁絮腸迴九轉憶少年意氣
無幾老大些兒事思量遍自笑頭顱種種香難追石
光飛電功名幻想文章鄙事豪華虛願往者何人有才
無命公乎慙忝羨滄浪舊侶綠簑青笠釣舟輕便

綺羅香

送燕

春去無蹤秋來有信一霎光陰如雨燕燕于飛軟語商
量欲去憶曾過王謝高門又忽見金張新第儘人間苑

屋華堂惆悵淹留無幾
臨歧多少叮嚀料前路相逢
雁行迢遞我去君來黯絕
魂銷此際任空梁落剩香泥
憐故壘拖殘花蒂怕廢興
南北相同見舊巢安未

永遇樂

同陳俞二子過惠山茶肆小飲醉後感作

細雨還晴剩寒新暖清和天氣五里長街九龍峰下比
舊風光美良朋連袂單衫小扇依約冶遊情味問誰家
曲徑朱欄紅杏赤葵交媚
沽來斗酒頽然醉了笑折

花枝簪髻拍手狂呼揮盃自勸暗搵無端淚英雄失路
書生落拓同是一般憔悴空歸去野水方塘瞥看山翠

二郎神

吳門感舊

依稀猶在金谷春光如海步障錦絲圍妙舞清歌交賽
粉行珠隊誰道司空渾見慣幾回聽霓裳仙籟美此際
人間天上有數風流嘉會無奈名士傾城目眙心醉
恨楊柳風多花早落道月缺難圓易壞綠珠樓墜翻風

老才人廝養還相配幾春來秋去池塘蛙鼓遠山疑黛
望遠行

飲孟廣文宅

依然東野先生也門徑蕭條如寄誰家梁肉到處笙歌
豈識廣文風味數朵黃花點綴西風籬落歸去來兮還
未怪歸來却剩秋光無幾
媿媿剪燭窓前夜話公瑾
醇醪相對此夕啣盃昨朝傾蓋北地南天千里我自漁
舟醉舞如君高致休賦不才長棄只襄陽耆老暫棲衡

泌

薄倖

戴溪感舊

錦燈良夜記當日笙歌纔罷
邂逅赤闌干畔窈窕天生
如畫悵前緣一笑分離喜
今日相逢未嫁任青鳥書
傳藍橋水落猶恨蓬山天外
舊日桃花門巷都一霎
蝶飛雲化縱玉清非遠
少君有街道帳裏姍姍欲下
是耶非也看一坏黃土在
做出燕齊迂怪年年寒食風雨

白楊沾灑

風流子

村居二首

梅花村墅裏三間屋一帶短籬遮見杜老堂成滿堦馴
雀蔣生逕啓幾樹藏鴉更兼有松間堪抱膝柳下好停
車有客來時三盃桑落無人到處一逕桐華道先生
隱者好裁成芟服買就漁舫更覺神清秋水骨秀煙霞
任世上浮沉風飄耳畔人間得失絮落天涯笑指華胥

古道這是儂家

吾將從此逝吾何意吾亦愛吾廬看眼底浮雲花從開
謝堦前生意草不芟除閒尋去古苔侵石罅流水灌山
厨盍歸來乎一琴一鶴薄言觀者非我非魚何人長
握手有西隣野叟能賦能書便相逢成二老一樣清癯
且自墮三盃胞中浩浩黑甜一枕世外蘧蘧人笑高陽
去後又兩狂且

過秦樓

七夕狂風甚雨

噓氣號空傾盆連夕迅雨狂飈堪怖牛渚波翻銀河浪
捲誰許鵲橋輕渡一刻千金此時低鈞參媒雙星初晤
奈多磨好事月姊無情風姨偏妬能消得幾許綢繆
玉鷄啞啞蚤是五更風露癡兒駭女瓜果樓前樓上穿
針纔度爭向天孫訴懷得巧休懽乞時休苦算從前巧
悞天孫肯復送君相悞

沁園春

寄題徐道力玉禾堂

四海浮鷗一身落葉何事堪憑歎
輞川烟水徒供入畫
桃源鷄犬莫渡迷津金谷風塵銅駝荆棘那處青山可
卜隣君何幸有玉禾片地松菊長存
草堂風味蕭森
敢喚作羲皇以上民羨江干車馬誰人問字筵前樽酒
有客携琴春草能花秋蟲自語一榻清風且曲肱他年
過記登斯堂也心曠神清

偶興和王阮亭韻二首

吾道非耶滔滔皆是歲月空流問君子之交誰甘如醴
古人自許敢曲如鉤落落無徒囂囂自得九點青烟望
九州嗟多少是藍田舊將瓜圃通侯一觴一咏相酬
任落葉隨風水上浮只越水吳山從吾所好竹籬茅舍
於世何求醉裏乾坤閒中今古麋鹿為群侶白鶴休相
認有少年同學肥馬輕裘

長嘯歸來或漁於溪或圃於岡且可否之間不夷不惠
中行豈敢疑猶疑狂白眼看他青山老我漫世居然入

世方休再道曾封侯萬戶昔遇高皇
閒來濯足滄浪
又種竹千枝木幾章愧能酒能詩陶潛李白亦經亦史
司馬公羊醉後長歌燈前自舞也算生平意氣場嗟今
日只黑甜一枕快矣吾鄉

壽孫母龔太君為又學賦

問母為誰為姜為陶為尹為班念熊丸早歲孤燈黯黯
絳帷當日環珮珊珊儼是經師曾傳女誡彤管千秋姓
氏看今何在在鹿門深處介子山間
高風更許誰攀

喜偕隱蕭蕭綠野間
況潘輿長侍花前
簾筍菜衣長曳
庭除斑斕樂且含
飴貧能負米豈識
人生行路難尤堪
羨聽霞觴捧罷春
鳥間關

悲秋

宋玉言之春女多思
秋士多悲况零風
細雨乍停還續
蛩聲雁影到處相
隨四壁蕭蕭孤燈
落落縱有高懷那
處開除非是且登
山涉水打馬飛盃
醉時屢舞回回
看雲氣漫空白日
頽似江魂銷罷黯
然欲別潘愁盡處

如送將歸人事蕭條天公做作長笑微吟淚暗垂還自
問這黃花紅葉干汝誰來

題位公小照

咄爾何人長松之下古栢之間看蒲團穩坐神清落落
布袍長褱風骨珊珊一拂一盂不鞋不杖白石如龍草
似綿抵多少在恒沙小劫夢泡塵緣西來踪跡蕭然

猶髣髴當初面壁年曾與誰摩頂菩提座下何方行腳
舍衛城邊辨欲忘時心將安訖春綠秋紅自在天人只

見有茆菴方丈片席青蓮

恭展先慈遺照示舍弟初子

跪展遺容傷哉吾母如見當年憶含毫想像桐花窓下
整衣端坐萱草闌邊堂上含飴堦前舞綵十載悲歡髮
鬢間兒偏愧愧霞冠鳳帔何日重添思量經幾團圞
歎忽地音容便渺然痛臨歧針線行時密密隔江烽火
病後懨懨寥落倚閭倉皇避地衣帶盈盈判各天還慰
藉有朝溫夕省嗟仲能賢

服官刑曹止兩月而先慈訃至後竟以他累坐廢未受

封勅

賀新郎

往事

往事卿思否十年來幾嘆幾喜相偎相守漫道悲懽如
水去提起心頭都有卿且置一觴一笑拔金釵閒指
點一椿椿欲說還搖手恐化作皤然叟何妨憤憤居
人後更誇甚筆搖千字胸盤二酉對酒當歌卿試舞長
袖離披紅溜為卿盡先生五斗醉看諸兒群遶膝待長

成五嶽容吾走卿好做尋山偶

內子買浦氏舊宅一區前有隙地余種梅花三百株因賦示

笑指梁鴻婦記當初伯通廡下縞衣相守椎髻短裝君
似昔怪我年來老醜肯辜負緋桃穠柳何物清寒堪似
我與梅花作對差能否人喚作孤山叟 須栽三百羅
前後舞春風漫空飛雪暗香堆袖待得花開梅子熟換
取東隣美酒拚再倒田家瓦缶白眼乾坤多少大儘蝸

頭冠蓋相趨走君隱矣吾何有

十月幾望順德署中與諸公醉後看月時余自
七夕後往句曲至此凡四閱月矣

今夕斯何夕又一度月當三五團圓時節短髮飄蕭清
影下添卻露淒風切還自笑輕衫蟬翼多少炎涼都歷
盡舊腰身鍊作冰霜骨何用補貂裘黑 懽然相見憐
相別漫指點銀瓶索酒臣能一石太守清狂應不改豪
興吾徒猶昔休只把唾壺敲缺醉跨瘦驢何處去盍歸

乎浪舞馮驩鉄且再看滄江雪

讀西寺趙吳興所書虛照禪師塔銘

屹爾蹲空碧手摩挲碑高幾丈大書深勒柳骨顏筋爭
勝外別有吳興筆力看何似簪花風格人待文傳文孰
待待行間珠玉淋漓墨天下寶應同惜驚如風雨揮
毫夕堪想像銀鈎鉄畫腕隨心得舍利光明同照耀一
片大千虛白曾經幾露痕霜跡師弟名聲相上下問今
朝誰搨虛舟碣骨朽矣人猶宅

虛舟係照嗣亦有集賢
學士王思廉所撰碑銘

而照碑為翰林承旨陳庭
寔所撰以吳興書法獨傳

摸魚兒

送春

怪當初春來何意今送春歸何處游絲繞地漫天絮頃
刻鶯花無主留不住那復管黃鸝啼斷斜陽樹算誰相
顧只紈扇兒郎紅衫小女餞卻東郊路從今後總任
梅黃杏紫別換一番風雨牡丹亭畔梨花院也自錦圍
玉聚空延佇長冷落王孫寶騎笙歌墅此情休訴羨蝴蝶

蝶顛狂花間栩栩不問伊來去

綠頭鴨

端午

趁晴明恰正是女兒佳節雙雙姊妹相携倩娘梳牡丹
新髻邀郎着杏子單衣玉璽新裁紅絨細嚼金釵押襯
石榴枝人都道內家粧束別樣風姿莫遲疑綉旗畫
戟逢逢鑼鼓來時被花遮簾前煩惱驚人顧背後矜持
又何處清謳檀板一派好風吹酒後三絃歌闌十番

叶法

誰家浪子擁妖姬忙迴避蕩舟歸去說與郎知

十二時

送史庸菴赴補北上

先生那得高眠也且為蒼生一起正五月嫩晴天氣門
外柳濃波翠兩載朱幡三年黃綬總是心如冰驪唱罷
琴鶴蕭然欸乃扁舟月色江聲相倚最牽情歸來曾
賦幾點鷺朋鷗伍白社清吟蘭亭高會事事關人意看
縱橫斑管烏絲疎狂餘幾喜今朝柔鄉翠國別有一


番風味月底笙簫風前蘭麝望裏神仙侶只高陽舊伴
醉踏漁舟歸去

玉女搖仙珮

壽巢儀部兼山先生六十

天衢貴客粉署仙郎未老拂衣歸去新製荷裳纔成小
築恰在白雲深際看門前流水并樓頭明月蕭然佳致
更說甚野間綿蕞殿上歌呼叔孫典禮好白眼科頭簾
杖芒鞋山顛水際更有井公園客金粟洪崖笑語從

容聯袂五夜鸞簫九霄笙鶴人世繁華無比怪婚男嫁
女把向平早歲良時輕棄問先生逍遙五嶽舊時都養
容吾執御兩不負有巢家世黃熊裔



十五家詞卷十七